

Plácido Álvarez Dobaño na súa condición de voceiro do Grupo Popular na Deputación Provincial de Ourense, con base no previsto nos artigos 91 e 97 do ROF, e de acordo á Lei de bases reguladora do réxime local e o Regulamento da Corporación, presenta a seguinte **MOCIÓN SOBRE A VARIANTE EXTERIOR DE OURENSE NA ALTA VELOCIDADE FERROVIARIA.**

EXPOSICIÓN DE MOTIVOS

A chegada a Ourense da alta velocidade ferroviaria suporá un fito histórico que a provincia e a súa capital deben aproveitar para seren territorios máis competitivos.

O 19 de abril de 2013 a anterior ministra de Fomento, Ana Pastor, presentaba en Ourense o novo proxecto de integración ferroviaria na capital co obxectivo de integrar e dar adecuada resposta ás opinións de todas as administracións, institucións e sectores implicados (Ministerio de Fomento, Xunta de Galicia, Deputación e Concello de Ourense).

A ministra confirmou a variante proxectada entre Taboadela e Ourense como a solución máis axeitada para a chegada da alta velocidade á cidade. Propuxo unha modificación de trazado entre Taboadela e Seixalbo. Unha modificación parcial en planta e alzado, que acurtaba o túnel de Rante en 1.700 metros, pasando de bitubo a monotubo e con dous novos viadutos.

En definitiva optimizábase o trazado contemplado no proxecto de 2011, facendo unha reformulación dalgunhas das actuacións ferroviarias complementarias, co obxectivo de favorecer a conexión de alta velocidade nos prazos previstos e o máximo aproveitamento dos recursos dispoñibles.

Desde aquela data fóronse sucedendo diversos avances administrativos na tramitación ministerial desta variante ferroviaria.

A mesma ministra de Fomento o 22 de xuño de 2016 reiterou nunha visita á nosa cidade, o compromiso con esta variante, afirmando que “para o tramo Taboadela-Ourense, propuxemos unha solución optimizada, sustentable e funcional, que por suposto mantén as prestacións expostas no Estudo Informativo inicial e que posibilita a chegada do AVE á cidade de Ourense e que se trata dunha solución consensuada con todas as administracións”.

Tamén nesa data informaba que, no tramo Taboadela-Seixalbo, o expediente estaba en mans do Ministerio de Agricultura, Alimentación e Medio Ambiente. E que todos os proxectos estaban na súa fase final, co obxectivo de licitar as obras tan pronto como dispoñamos do visto e prace ambiental. E que, entre Seixalbo e o Túnel de Montealegre estaba a concluír a tramitación ambiental. E que no tramo máis avanzado, Túnel de Montealegre-Estación de Ourense, estaba a se finalizar o proxecto, axustándoo ao acordado co Concello e logo proceder a licitar as obras.

Nesa liña de avance administrativo, con data 3 de novembro de 2016 o BOE publicaba a Resolución do 20 de outubro de 2016, da Secretaría de Estado de Medio Ambiente, referida ao impacto ambiental dos Proxectos de Construción dos tramos Seixalbo-Túnel de Montealegre e Túnel de Montealegre-Estación de Ourense e do proxecto básico do tramo Taboadela-Seixalbo.

Daba conta de que, como consecuencia do proceso de información pública dos devanditos proxectos, se recibiron numerosas alegacións en oposición á utilización dos vertedoiros V-1 e V-2, tanto de particulares, como do Concello de Taboadela, agrupacións políticas e asociacións de afectados. E, finalmente, informaba favorablemente a proposta de novo vertedoiro, cumprindo os requisitos ambientais.

É dicir, o proceso administrativo e ambiental da variante avanzou dun xeito lento pero decidido desde 2013 ata novembro de 2016.

No pleno do debate sobre o estado da provincia aprobouse unha proposta de resolución para a execución de todas as actuacións previstas para que a chegada da alta velocidade sexa unha realidade cumprindo os prazos establecidos.

En virtude do exposto, **SOLICITAMOS AO PLENO DA DEPUTACIÓN DE OURENSE que adopte o seguinte ACORDO.**

1.- “Instar ao Ministerio de Fomento a que, en coherencia con todos os pasos administrativos antes citados, proceda nesta lexislatura a continuar avanzando na execución da proxectada variante ferroviaria entre Taboadela e Ourense”.

2.- Trasladar copia deste acordo ao Presidente do Goberno de España e ao Presidente da Xunta de Galicia.

Ourense, 13 de decembro de 2016.

Asdo.: Plácido Álvarez Dobaño.

SR. PRESIDENTE DA DEPUTACIÓN DE OURENSE.-